

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA
Broj:04-011-59/98
Sarajevo,14.juli 1998.godine**

ZAPISNIK

**10. sjednice Doma naroda Parlamentarne skupštine Bosne i Hercegovine
održane 3. jula 1998. godine u Zemaljskom muzeju - Sarajevo**

Sjednica je počela sa radom u 10 sati.

Sjednicom je predsjedavao Petar Majić,predsjedavajući Doma naroda Parlamentarne skupštine Bosne i Hercegovine.

Predsjedavajući je konstatirao da sjednici prisustvuje dovoljan broj delegata i da Dom može punovažno odlučivati.

Pored delegata, sjednici su prisustvovali i članovi Vijeća ministara i predstavnici Međunarodne zajednice.

Prije usvajanja dnevnog reda za današnju sjednicu, predsjedavajući je obavijestio delegate da je Kolegij Doma naroda odlučio da se Prijedlog zakona o osnovama privatizacije preduzeća i banaka u Bosni i Hercegovini razmatra na sljedećoj sjednici, a ne na današnjoj kako je bilo predloženo u pozivu za sjednicu.

Za sjednicu je usvojen sljedeći

DNEVNI RED:

1. Usvajanje Zapisnika sa 9. sjednice Doma naroda,
2. Prijedlog zakona o pečatu institucija Bosne i Hercegovine,
3. Davanje saglasnosti na Ugovor o zajmu (projekat hitne obnove telekomunikacija)između Bosne i Hercegovine i Evropske banke za obnovu i razvoj,
4. Davanje saglasnosti na kreditne sporazume za sljedeće projekte Svjetske banke:
 - a) Projekat šumarstva,
 - b) Kredit za strukturno prilagođavanje,
 - c) Hitna rekonstrukcija elektroenergetskih sistema II,
 - d) Hitan pilot kredit projekat,
5. Delegatska pitanja.

Ad-1.

Usvajanje Zapisnika sa 9.sjednice Doma naroda Parlamentarne skupštine Bosne i Hercegovine

U raspravi nije niko učestvovao.

Zapisnik sa 9. sjednice Doma naroda, održane 18. maja 1998. godine usvojen je bez primjedbi.

Ad-2.

Prijedlog zakona o pečatu institucija Bosne i Hercegovine

Prijedlog ovog zakona Parlamentarnoj skupštini Bosne i Hercegovine dostavio je Ured visokog predstavnika.

U raspravi su učestvovali: Mirsad Ćeman, Momir Tosić, Avdo Čampara i Mariofil Ljubić.

Na tekst Prijedloga zakona četiri amandmana podnio je delegat Mirsad Ćeman - na čl. 3., 6., 7., i da se doda novi član 7a.

Poslije rasprave o amandmanima delegat Mirsad Ćeman odustao je od amandmana III i IV.

Predsjedavajući je stavio na glasanje amandmane I i II Mirsada Ćemana.

Amandman I

Na član 3. Prijedloga zakona koji glasi:

"U članu 3. tekst: Pečat se proizvodi u dvije veličine prečnika 50 mm odnosno 30 mm " da bude stav 2. ovog člana zajedno sa sljedećim tekstom koji se dodaje: "Organi i organizacione jedinice institucija iz člana 7. ovog zakona mogu imati i pečat prečnika 20 mm radi potvrđivanja finansijskih i drugih dokumenata gdje upotreba većeg pečata nije pogodna."

U istom članu u prvom redu iza riječi "sadrži" dodaje se riječ "tekst".

Ovaj amandman usvojen je jednoglasno i postao je sastavni dio Prijedloga zakona o pečatu institucija Bosne i Hercegovine.

Amandman II

U članu 6. u drugom redu iza riječi: "proizvodnje" dodaje se riječ: "čuvanja", te stav 2. i 3. koji glase: "Podzakonski akt kojim će se regulisati pitanje iz prethodnog člana Ministarstvo za civilna pitanja i komunikacije će donijeti u roku od 15 dana od dana stupanja na snagu ovog zakona.

Nadzor nad radom ovlaštene pečatoreznice u pogledu izrade pečata vrši Ministarstvo za civilna pitanja i komunikacije".

Predsjedavajući je konstatirao da je i ovaj amandman jednoglasno prihvaćen i da je postao sastavni dio Prijedloga zakona o pečatu institucija Bosne i Hercegovine.

Potom se prešlo na usvajanje Prijedloga zakona u cjelini.

Na osnovu rezultata glasanja predsjedavajući je utvrdio da je Dom naroda Parlamentarne skupštine Bosne i Hercegovine jednoglasno usvojio Prijedlog zakona o pečatu institucija Bosne i Hercegovine.

Ad-3.

Davanje saglasnosti na Ugovor o zajmu (Projekat hitne obnove telekomunikacija) između Bosne i Hercegovine i Evropske banke za obnovu i razvoj

U raspravi nije niko učestvovao.

Dom naroda Parlamentarne skupštine Bosne i Hercegovine donio je odluku o davanju saglasnosti na Ugovor o zajmu (Projekat hitne obnove telekomunikacija)

između Bosne i Hercegovine i Evropske banke za obnovu i razvoj, u predloženom tekstu.

Ad - 4.

Davanje saglasnosti na kreditne sporazume za projekte Svjetske banke

a) Sporazum o razvojnom kreditu (Drugi projekat za obnovu energetskog sektora) između Bosne i Hercegovine i Međunarodne asocijacije za razvoj.

b) Sporazum o kreditu za razvoj privremenog fonda (Projekat šumarstva) između Bosne i Hercegovine i Međunarodne asocijacije za razvoj.

c) Sporazum o kreditu za razvoj (Hitni projekat pilot kredita) između Bosne i Hercegovine i Međunarodne asocijacije za razvoj.

d) Sporazum o razvojnom kreditu (Kredit za strukturalno prilagođavanje javnih finansija) između Bosne i Hercegovine i Međunarodne asocijacije za razvoj.

Prije rasprave predsjedavajući je konstatirao da na sva četiri projekta postoji saglasnost Predsjedništva Bosne i Hercegovine i saglasnost premijera oba entiteta, s tim što je na Projekat "šumarstva Premijer Vlade Federacije BiH gospodin Edhem Bičakčić u svojoj saglasnosti tražio izuzeće u djelovima koji se odnose na naziv implementatora projekta, u tom smislu da se umjesto "BiH šume" uvrsti javno preduzeće za upravljanje"šumama koje će biti formirano u skladu sa Zakonom o šumama Federacije Bosne i Hercegovine.

U raspravi nije niko učestvovao.

Na osnovu rezultata glasanja predsjedavajući je utvrdio da je Dom naroda Parlamentarne skupštine Bosne i Hercegovine jednoglasno dao saglasnost na sva četiri navedena sporazuma, u predloženom tekstu.

Ad-5.

Delegatska pitanja

1. Delegat Satih Kulenović postavio je sljedeće delegatsko pitanje:

"Šta je nakon rata, okončanog Dejtonskim sporazumom, urađeno u Bosni i Hercegovini da se uspostavi arhivska mreža na cijelom prostoru, kako bi se uspostavila kontrola nad stanjem zaštite arhivske građe koja je stradala u ratu te kada će biti donijeti novi arhivski propisi o ovom za državu, historiju i kulturu veoma bitnom pitanju."

2. Delegat Adem Borić postavio je sljedeće delegatsko pitanje:

"Mene zanima kada će proraditi željeznička pruga Bosanski Novi - Bihać - Split i obrnuto Split - Bihać - Bosanski Novi prema Sarajevu i prema Zagrebu. Dakle, naš je životni interes da ta pruga proradi. "

3. Delegat Mirsad Ćeman ukazao je da još uvijek nije dobio odgovore na delegatska pitanja koja je postavio prije nekoliko mjeseci. Tom prilikom Mirsad Ćeman postavio je delegatsko pitanje u vezi sa upotrebom imena Bosna i Hercegovina na aktima iz Republike Srpske, tako da na svim aktima treba da piše Bosna i Hercegovina pa tek onda Republika Srpska.

Kopredsjedavajući Vijeća ministara gospodin Haris Siiajdžić odgovorio je na neka delegatska pitanja i tom prilikom predložio da i Parlamentarna skupština Bosne i Hercegovine treba da razmatra realizaciju i sprovođenje Aneksa 9 Sporazuma

o osnivanju javnih korporacija Opšteg okvirnog sporazuma za mir u Bosni i Hercegovini.

Magnetofonski snimak sjednice Doma naroda čini sastavni dio ovog zapisnika.

Sjednica je završila sa radom u 10,45 sati.

**PREDSJEDAVAJUĆI
DOMA NARODA
PARLAMENTARNE SKUPŠTINE BiH
Petar Majić. s.r.**